

三怡堂叢書

妙遠堂詩鈔

三九

三才圖會

卷一

南陽先民集

妙遠堂詩鈔

南陽蔣藩署



庚午冬十月
陶然齋開雕

南陽先生集

妙遠堂詩集序

新野仲良馬公蓋予之外大父行也新野距吾鄧五十里而羸冠蓋甲第相望公方弱冠偕兄宗伯公登甲科跼蹐制作庭然卒不獲館選一官蹢躅旋起旋仆於當世既少所可益伉爽自負視館閣諸君率葫蘆依樣甚者椽窗告矣用相訾謗曰課量聲詩盤礴山阿佛窟間酒旗歌板一寫其宿徃流連之致當是時竟陵鍾伯敬張一軍向之耳食於濟南瑯琊者轉而趨其約束公同年相友善顧齟齬不相下伯敬陽推尊之實遠之也公英分臆發得名又蚤於前人所謂蒼樓古淡或尙有待錢虞山論次列朝詩謂

其學古未純良然至謂其少年盛氣腸肥腦滿少師友鑢
厲之功未爲篤論予縱覽全集知妙遠二字是其真諦寫
難狀之景摻無窮之變於他人鏤心擢肝而弗獲者一經
拈出如荷葉珠如松針露如曳雲之無定姿人人意中作
一微妙觀雖曰夙生超詣實亦慘費經營矣當時海內簪
珪之流互相提唱裴徊惋惜至有假年之歎詎不信然顧
先生雖年不及四十未躋華要而風流照灼騰華茂實塤
篋之間爵秩雖有崇卑聲施實相伯仲視古來文人薄命
如王子安之早赴汨羅盧仝華之惻愴病梨修短榮悴相
去孰多往者寇躪中州典籍放失獨所謂妙遠堂者板雖

無存尙有印本藏之遺老敗壁間不隨塵燄俱灰今猶得
就此巋然僅存者爲之摹刻以傳是公之精英不沒長存
於天壤間榮名爲寶雖千百者艾無以易茲矣康熙四十
八年夏四月愚孫壻彭始搏直上書於嘉禾官舍

妙遠堂詩鈔卷之一

新野馬之駿仲良撰 孫壻彭始搏直上重校刻

公集凡刻兩次其分類者係妻祖宗伯公於公歿後總前後集而刻之金陵世所傳妙遠堂全集是也外舅雲孫公自江南携歸燬於流寇之亂所存一二抄本得之友人故簾敗壁間頗疑其前後叅錯不及分年之集猶可見當時情事始末蓋係公所自訂前有先宗伯公序然亦缺落不全矣壬午在京師偶於漁洋先生案頭見之未及全錄止就分編之目次彙而抄之以歸戊子冬嘉禾重校照此編輯其間或有無可考證者妄自揣度

斟酌而次序之其桐雨齋至緣吹齋係京師及于役吳
闕作自且軒以訖於畸草係遷謫休里門及別駕陪京
時後四種公有小序今貫於各編之首苦餘草係讀禮
時所成惜未得其全因以甲子赴都諸作附之於後

桐雨齋草

春日遊陳氏園與荆伯鶚張伯寅徐象一梁有實傅

仲綸同賦

但覺郊原濶仍看物態殊漲烟松欲暝欹雨竹難扶覆射
矜頻中觴飛督偶連不愁供卧簟先慮竭行厨
睡蝶攀枝見殘鶯逐樹聽花沾晴露白林立晚陰青茶氣

衝簾起歌聲近水停野鷗隨去住與我共忘形

閏三月同丘毛伯鍾伯敬韓求仲沈士範宋獻儒胡
仲修王曰常家時良集米仲詔湛園和伯敬韻

良朋雖偶約幽事却從人樹影留殘晝禽言變晚春石將
邀客拜花欲誤漁津纔與輪蹄隔堪驚物外身

夏日同鍾伯敬湯去執遊西山出西直門道中作

看山在城中可想不可有車馬促朝叅看山亦難久杖策
誠非艱胡爲日摧首我志在勇往況携同心友逶迤越重
圍蒼翠忽如揉活活溪韻長靡靡樹陰厚藍筍灑松風快
此褰帷受禮壇穿層花踐_杙憩高柳造境豈必深會心在

所取

廻龍潭

倒景有意好溪路無人幽三人踞三石聲影隨波流天宇
澹可拾風文輕旋收仰怯飛羽墮俯玩修鱗遊忘言騁遐
矚林溼青悠悠

金山寺月

疎鐘警空壑蛙鬧不知喧行觸樹藤罍坐留橋石溫閒拈
方外事共作丘中言忽報過溪虎山僧催閉門

香山寺

割翠開雙戶流丹架百層路高行漸濕雲鎖石難崩池影

魚遊樹巖聲鼠竄藤澗風排霧出海日帶霞升鹿下時驚
客猿馴嬾避僧西方支許社端不悵無朋

送湯去執入洛應輦令程之聘

旅病勞行役耕漁違野心遊爲貧所就恨與別相尋吟對
夏雲變夢歸秋水深臨邛恭不謬翻覺礙援琴

送史言爲令會稽

史陽
羨人

里居山水最菰蒲綠綬專城復勝區沙月薄迎雙槳動江
潮涼送一琴孤援書古穴饒科斗酌酒荒臺祇鷓鴣魚笱
高齋堪自飽甌塵無用學萊蕪

繡佛歌爲王長卿內子作

王郎手持一疋絹香氣淋漓隔紙見展之使我起敬心普
陀大士開生面細玩總非綵繪成閨人纂組通神明合掌
低眉各極趣衣摺鬢雲不知數望去真疑瞻寶月捫來直
似籠輕霧筆墨寧惟失勝場純絲兼亦無鍼路王郎字學
陰符經令子復解施丹青先掃白地具勾畫素腕纔經滅
形跡谿逕已脫骨力存君家雅事何其繇乃知絕技古今
有爾時非心亦非手前身自是天人師億萬化身一掌取
更聞慧性能護持纖塵不肯沾輕絲三秋僅僅成二幅雨
溼風昏輒置之晚窓倦指焚香坐想見王郎頂禮時

十方菴和伯敬韻

何處堪消暑非山則水鄉樹深渾欲暝花近反無香心靜
鳴蟬裏身閒浴鷺傍娟娟時映浦采采未褰裳欲晚波難
綠迎秋木漸蒼市譁原未遠烟景乃微茫

送劉生還里時劉有長兄之變

對爾鄉愁積何當復送歸砌寒蛩自默沙淺雁何依暫別
家多難微名計屢違帝城秋月好惆悵各清輝
每憶同來日難爲獨往心村炊初稻粒野望欲楓林歡想
秦嘉鏡悲憐子敬琴尊鱸子有思早晚或相尋

八月十四夜集焦園

忽負三秋色堪先一夕期露滋苔影重日薄樹文欹絃管

幽相借池臺野任爲去留憑醉準非爲月能遲

折柳悲樓邃驚梧近井牀人如坐空水樹欲警微霜砧杵
同千戶關山自一方飛鳥疑厭客驚斷不成行

卓錫泉亭

石洞何年闢孤筇此日經樹當懸壁翠竹過曲池青古蔓
高於屋新荷細若萍相看理吟嘯猿鳥驟來聽

此首原在香山寺排

律之下

送龍君御備兵湟中

長劍危旌指壯遊豈論骨法應封侯葡萄榨暖堪留醉楊
柳城寒詎綰愁敎市到關驚姓字邊人迎轍記春秋天山

更待磨崖筆定遠如何便浪投

念歸

念歸歸未果無計不遷延行日憎頻改離觴笑悞傳河愁
過衛陳寒較入燕偏故國逢殘臘關心記往年

冬夜盧虹仲陶路叔張大木集寓中兼懷張伯寅徐
象一分得浮字

虛堂一笑足相留旋簇明燈典敝裘歸雁各天今昔夢啼
鳥殘夜淺深愁城頭寒角吹霜落禁裏昏鐘帶月流不藉
糟丘能永日金門何計免沉浮

秋日草橋讌集

補註帝京景物畧曰右安門外南十
里草橋方十里皆泉會橋下伏流十